



27 აპრილი, 2023
№ 23/03-937

საქართველოს ეკონომიკისა და მდგრადი განვითარების სამინისტროს
სსიპ ტექნიკური და სამშენებლო ზედამხედველობის სააგენტოს უფროსს
ბატონ გიორგი გუჯაძეს

ადმინისტრაციული საჩივრის ავტორი:
ა(ა)იპ მწვანე ალტერნატივა
ს/კ: 204952676

ადმინისტრაციული საჩივარი

გასაჩივრებული მოქმედება:

სსიპ ტექნიკური და სამშენებლო ზედამხედველობის სააგენტოს საჯარო ინფორმაციის გაცემაზე პასუხისმგებელი პირის 2023 წლის 7 აპრილის გადაწყვეტილება, რომლითაც არ დაკმაყოფილდა ა(ა)იპ “მწვანე ალტერნატივას” 2023 წლის 28 მარტის #23/03-934 განცხადების მოთხოვნა საჯარო ინფორმაციის გაცემის შესახებ.

ადმინისტრაციული საჩივრის მოთხოვნა:

გაუქმდეს სსიპ ტექნიკური და სამშენებლო ზედამხედველობის სააგენტოს საჯარო ინფორმაციის გაცემაზე პასუხისმგებელი პირის 2023 წლის 7 აპრილის გადაწყვეტილება, რომლითაც არ დაკმაყოფილდა ა(ა)იპ “მწვანე ალტერნატივას” 2023 წლის 28 მარტის #23/03-934 განცხადების მოთხოვნა საჯარო ინფორმაციის გაცემის შესახებ; დაკმაყოფილდეს ა(ა)იპ “მწვანე ალტერნატივას” განცხადების მოთხოვნა და გადმოგვეცეს შემდეგი საჯარო ინფორმაცია:

- ქალაქ თბილისში, რუსთავის გზატკეცილის N68ა-ში, ფერადი ლითონის (ფერო შენადნობი) ჩამოსხმის საწარმოს მშენებლობის ნებართვის (ან ცალკეული ეტაპის გადაწყვეტილების) გაცემისათვის ჩატარებული სრული ადმინისტრაციული წარმოების მასალები.

გარემოებანი, რომელსაც ეფუძნება საჩივრის მოთხოვნა:

1. 2023 წლის 28 მარტს ა(ა)იპ “მწვანე ალტერნატივამ” №23/03-934 წერილით მიმართა სსიპ ტექნიკური და სამშენებლო ზედამხედველობის სააგენტოს და მოითხოვა შემდეგი საჯარო ინფორმაციის გაცემა:

- ქალაქ თბილისში, რუსთავის გზატკეცილის N68ა-ში, ფერადი ლითონის (ფერო შენადნობი) ჩამოსხმის საწარმოს მშენებლობის ნებართვის (ან ცალკეული ეტაპის გადაწყვეტილების) გაცემისათვის ჩატარებული სრული ადმინისტრაციული წარმოების მასალები.

სზაკ-ის მე-40 მუხლით განსაზღვრული 10 დღიანი ვადის გასვლის (2023 წლის 7 აპრილს) მიუხედავად, დღემდე არ გვაქვს გადმოცემული მოთხოვნილი საჯარო ინფორმაცია.

მტკიცებულება: დანართი 1. ა(ა)იპ "მწვანე ალტერნატივას" 2023 წლის 28 მარტის #23/03-934 წერილი

საჩივრის სამართლებრივი საფუძვლები:

1. სზაკ-ის 2.1 მუხლის "ა" ქვეპუნქტის თანახმად, ადმინისტრაციული ორგანო არის ყველა სახელმწიფო ან ადგილობრივი თვითმმართველობის ორგანო ან დაწესებულება, საჯარო სამართლის იურიდიული პირი (გარდა პოლიტიკური და რელიგიური გაერთიანებებისა), აგრეთვე ნებისმიერი სხვა პირი, რომელიც საქართველოს კანონმდებლობის საფუძველზე ასრულებს საჯარო სამართლებრივ უფლებამოსილებებს. მაშასადამე, სსიპ ტექნიკური და სამშენებლო ზედამხედველობის სააგენტო წარმოადგენს ადმინისტრაციულ ორგანოს, რომელზეც ამავე კოდექსის მე-3 მუხლის თანახმად ვრცელდება ზოგადი ადმინისტრაციული კოდექსის დებულებანი.

2. საქართველოს ზოგადი ადმინისტრაციული კოდექსის მე-40 მუხლით ადმინისტრაციული ორგანოსათვის დაკისრებული ვალდებულების შესრულება არ გულისხმობს ინდივიდუალური ადმინისტრაციულ-სამართლებრივი აქტის გამოცემას. ამავე კოდექსის 2.1 მუხლის თანახმად, ინდივიდუალური ადმინისტრაციულ-სამართლებრივი აქტი არის ადმინისტრაციული ორგანოს მიერ ადმინისტრაციული კანონმდებლობის საფუძველზე გამოცემული ინდივიდუალური სამართლებრივი აქტი, რომელიც აწესებს, ცვლის, წყვეტს ან ადასტურებს პირის ან პირთა შეზღუდული წრის უფლებებსა და მოვალეობებს. მოცემულ შემთხვევაში ადმინისტრაციული ორგანოს გადაწყვეტილება – უარი საჯარო ინფორმაციის გადმოცემაზე არ აწესებს, არ ცვლის, არ წყვეტს და არ ადასტურებს პირის ან პირთა შეზღუდული წრის უფლებებსა და მოვალეობებს (ინდივიდუალური ადმინისტრაციულ-სამართლებრივი აქტის ერთ-ერთი ძირითადი ელემენტი).

მაშასადამე, აღნიშნული გადაწყვეტილება (საჯარო ინფორმაციის გაცემაზე უარი) ფორმალურ-სამართლებრივი თვალსაზრისით წარმოადგენს არა ადმინისტრაციულ-სამართლებრივ აქტს, არამედ ადმინისტრაციული ორგანოს მიერ განხორციელებულ ისეთ ქმედებას, რომელიც არ გულისხმობს ადმინისტრაციულ-სამართლებრივი აქტის გამოცემას ანუ სახეზეა რეალაქტი, რომელიც გამოიხატა ადმინისტრაციული ორგანოს უმოქმედობაში, მის მიერ საჯარო უფლებამოსილების კანონდარღვევით განხორციელებაში, რაც სზაკ-ის 5.1 მუხლის შესაბამისად დაუშვებელია.

3. სზაკ-ის 177.3 მუხლის თანახმად ადმინისტრაციული ორგანოს ქმედება, რომელიც არ არის დაკავშირებული ადმინისტრაციულ-სამართლებრივი აქტის გამოცემასთან, გასაჩივრდება ამ თავით დადგენილი წესით. მაშასადამე, ადმინისტრაციული ორგანოს უარი საჯარო ინფორმაციის გაცემაზე უარის თქმის შესახებ საჩივრდება სზაკ-ის მე-13 თავით დადგენილი წესით ადმინისტრაციული საჩივრის უფლებამოსილ ორგანოში წარდგენის გზით.

4. სზაკ-ის 178.1 მუხლის თანახმად, თუ კანონით ან მის საფუძველზე გამოცემული კანონქვემდებარე აქტით სხვა რამ არ არის დადგენილი, ადმინისტრაციულ საჩივარს განიხილავს და გადაწყვეტს ადმინისტრაციულ-სამართლებრივი აქტის გამომცემი ადმინისტრაციული ორგანო, თუ იქ არსებობს ადმინისტრაციულ-სამართლებრივი აქტის გამომცემი თანამდებობის პირის ან სტრუქტურული ქვედანაყოფის ზემდგომი თანამდებობის პირი. განსახილველ შემთხვევაში იმის გათვალისწინებით, რომ

ა(ა)იპ „მწვანე ალტერნატივას“ მიერ საჯარო ინფორმაცია გამოთხოვილია და შესაბამისად პასუხი (რეალაქტი) გაცემულია სსიპ ტექნიკური და სამშენებლო ზედამხედველობის სააგენტოს საჯარო ინფორმაციის ხელმისაწვდომობაზე პასუხისმგებელი პირის მიერ, შესაბამისად, ადმინისტრაციული საჩივარი ზემოაღნიშნული ნორმის დანაწესის დაცვით წარმოდგენილია მის ზემდგომ თანამდებობის პირთან, რომელიც არის სსიპ ტექნიკური და სამშენებლო ზედამხედველობის სააგენტოს უფროსი.

5. განსახილველ შემთხვევაში ადმინისტრაციულმა ორგანომ დაარღვია ადამიანის უფლებათა ევროპული კონვენციის მე-10 მუხლი, რომლის თანახმად ყველას აქვს გამოხატვის თავისუფლება. ეს უფლება მოიცავს ადამიანის თავისუფლებას ჰქონდეს მოსაზრებანი, მიიღოს და გაავრცელოს ინფორმაცია და იდეები.

6. ადმინისტრაციულმა ორგანომ დაარღვია საქართველოს კონსტიტუციის 18.2 მუხლი, რომლის თანახმად ყოველ ადამიანს აქვს უფლება თავისუფლად მიიღოს და გაავრცელოს ინფორმაცია, გამოთქვას და გაავრცელოს თავისი აზრი ზეპირად, წერილობით ან სხვა საშუალებით.

7. საქართველოს კონსტიტუციის 41-ე მუხლი, რომლის თანახმად ყოველ მოქალაქეს აქვს უფლება კანონით დადგენილი წესით გაეცნოს სახელმწიფო დაწესებულებაში მასზე არსებულ ინფორმაციას, აგრეთვე იქ დაცულ სხვა ოფიციალურ დოკუმენტს, თუ ისინი არ შეიცავს სახელმწიფო, პროფესიულ ან კომერციულ საიდუმლოებას.

8. ა(ა)იპ "მწვანე ალტერნატივას" მიერ მოთხოვნილი ინფორმაცია წარმოადგენს საჯარო ინფორმაციას, რომელიც არ განეკუთვნება სახელმწიფო, პროფესიულ და კომერციულ საიდუმლოებას. შესაბამისად, სსიპ ტექნიკური და სამშენებლო ზედამხედველობის სააგენტოს საჯარო ინფორმაციის ხელმისაწვდომობაზე პასუხისმგებელი პირის უარი (ე.წ. ვირტუალური გადაწყვეტილება) საჯარო ინფორმაციის გაცემის შესახებ უკანონოა.

9. ადმინისტრაციულმა ორგანომ დაარღვია „გარემოსთან დაკავშირებული საკითხების შესახებ ინფორმაციის ხელმისაწვდომობის, გადაწყვეტილებების მიღების პროცესში საზოგადოების მონაწილეობისა და ამ სფეროში მართლმსაჯულების საკითხებზე ხელმისაწვდომობის შესახებ“ კონვენციის პირველი, მესამე და მეოთხე მუხლების მოთხოვნა, როდესაც უარი უთხრა ა(ა)იპ მწვანე ალტერნატივას მოთხოვნილი ინფორმაციის გადაცემაზე, რომელიც კონვენციის მეორე მუხლის თანახმად არის „გარემოსთან დაკავშირებული ინფორმაცია“.

10. სზაკ-ის 41.2 მუხლის თანახმად, საჯარო ინფორმაციის გაცემაზე უარის თქმის შემთხვევაში საჯარო დაწესებულება ვალდებულია გადაწყვეტილების მიღებიდან 3 დღის ვადაში პირს წერილობით განუმარტოს მისი უფლებები და გასაჩივრების წესი, ასევე მიუთითოს ის სტრუქტურული ქვედანაყოფი ან საჯარო დაწესებულება, რომელთანაც წარმოებდა კონსულტაცია ინფორმაციის გაცემაზე უარის თქმის გადაწყვეტილების მიღებისას. სზაკ-ის 5.1, 96-ე და 41-ე მუხლებით დადგენილია ადმინისტრაციული ორგანოს ვალდებულება ინფორმაციის გაცემაზე უარის თქმის შესახებ მიიღოს დასაბუთებული გადაწყვეტილება და აწარმოოს საჭირო კონსულტაციები შესაბამის სტრუქტურულ ქვედანაყოფებთან ან/და საჯარო დაწესებულებებთან, რაც ადმინისტრაციულმა ორგანომ არ შეასრულა. მოცემულ შემთხვევაში ადმინისტრაციულმა ორგანომ მოქმედი კანონმდებლობის უხეში დარღვევით და ყოველგვარი დასაბუთების გარეშე არ დააკმაყოფილა ა(ა)იპ „მწვანე ალტერნატივას“ განცხადება საჯარო ინფორმაციის გაცემის შესახებ.

11. წარმოდგენილი ადმინისტრაციული საჩივარი აკმაყოფილებს ზოგადი ადმინისტრაციული კოდექსით დადგენილ მოთხოვნებს, დაცულია ამ კოდექსის 181-ე მუხლით გათვალისწინებული საჩივრის ფორმა, მისი წარდგენის კანონით გათვალისწინებული 30 დღიანი ვადა (გასაჩივრებელი ქმედება (რეალაქტი) ანუ საჯარო ინფორმაციის გაცემაზე უარის თარიღია: 2023 წლის 7 აპრილი) არ არსებობს ამავე კოდექსის 182-ე მუხლით დადგენილი ადმინისტრაციული საჩივრის მიღებაზე უარის თქმის საფუძვლები, ადმინისტრაციული საჩივარი წარმოდგენილია უფლებამოსილ ორგანოში, რის საფუძველზეც გთხოვთ:

1. მიიღოთ ადმინისტრაციული საჩივარი წარმოებაში;
2. განიხილოთ ადმინისტრაციული საჩივარი ზეპირი მოსმენით საჩივრის შემომტანი პირის აუცილებელი მონაწილეობით;
3. გაუქმდეს - სსიპ ტექნიკური და სამშენებლო ზედამხედველობის სააგენტოს საჯარო ინფორმაციის ხელმისაწვდომობაზე პასუხისმგებელი პირის 2023 წლის 7 აპრილის გადაწყვეტილება, რომლითაც არ დაკმაყოფილდა ა(ა)იპ "მწვანე ალტერნატივას" 2023 წლის 28 მარტის #23/03-934 განცხადების მოთხოვნა საჯარო ინფორმაციის გაცემის შესახებ; და
4. დაკმაყოფილდეს ა(ა)იპ "მწვანე ალტერნატივას" 2023 წლის 28 მარტის #23/03-934 განცხადების მოთხოვნა და გადმოგვეცეს შემდეგი საჯარო ინფორმაცია:
 - ქალაქ თბილისში, რუსთავის გზატკეცილის N68ა-ში, ფერადი ლითონის (ფერო შენადნობი) ჩამოსხმის საწარმოს მშენებლობის ნებართვის (ან ცალკეული ეტაპის გადაწყვეტილების) გაცემისათვის ჩატარებული სრული ადმინისტრაციული წარმოების მასალები.

საჩივარზე დართული დოკუმენტების ნუსხა:

1. ა(ა)იპ "მწვანე ალტერნატივას" 2023 წლის 28 მარტის #23/03-934 წერილი - 1 ფურცელი;
2. ამონაწერი სამეწარმეო რეესტრიდან- 2 ფურცელი;
3. რწმუნებულება - 2 ფურცელი.

სულ დანართი: 5 ფურცელი.

ნინო გუჯარაიძე
აღმასრულებელი დირექტორი

From:

[Nino Gujaraidze](#)

To:

[Tacsu Economy](#)

Subject:

ფონიჭალაში ფეროს მშენებლობის ნებართვის შესახებ საჯარო ინფორმაციის მოთხოვნის თაობაზე

Date:

სამშაბათი, 28 მარტი, 2023 12:28:00

Attachments:

[image002.png](#)

№ 23/03-934

საქართველოს ეკონომიკისა და მდგრადი განვითარების სამინისტროს
სსიპ ტექნიკური და სამშენებლო ზედამხედველობის სააგენტოს
საჯარო ინფორმაციის გაცემაზე პასუხისმგებელ პირს
ქალბატონ თამარ თოდუას

ქალბატონო თამარ,

გთხოვთ, გადმოგვცეთ ქალაქ თბილისში, რუსთავის გზატკეცილის N68ა-ში, ფერადი ლითონის (ფერო შენადნობი) ჩამოსხმის საწარმოს მშენებლობის ნებართვის (ან ცალკეული ეტაპის გადაწყვეტილების) გაცემისათვის ჩატარებული სრული ადმინისტრაციული წარმოების მასალები.

წინასწარ გიხდით მადლობას თანამშრომლობისათვის.

პატივისცემით,

ნინო გუჯარაიძე

აღმასრულებელი დირექტორი



მწვანე ალტერნატივა

თბილისი, 0179, ფალიაშვილის 39ბ, IV სართული

ტელ.: (+99532) 222 38 74

www.greenalt.org